

小品妙选



苏渊雷

底記

怀叙

山山

品品



感 怀 小 品

一	卜居与渔父·····	屈 原	1
二	伯夷列传·····	司 马 迁	3
三	李夫人临死托武帝·····	班 固	5
四	李陵说苏武·····	班 固	6
五	自序·····	刘孝标	8
六	自序·····	汪 中	9
七	与子俨等疏·····	陶 潜	11
八	论盛孝章书·····	孔 融	13
九	与吴质书（二则）·····	曹 丕	14
一〇	伤逝（三则）·····	向秀等	17
一一	与崔群书·····	韩 愈	18
一二	谪居书简（二则）·····	柳宗元	21
一三	与元微之书·····	白居易	27
一四	北江书简（二则）·····	洪亮吉	29

一五	与阳休之书·····	祖鸿勋	31
一六	板桥家书(四通)·····	郑燮	33
一七	辛亥腊游箱根与梁任甫书·····	康有为	39
一八	甲寅五月二十三日家书·····	章炳麟	42
一九	瘞旅文·····	王守仁	44
二〇	哀盐船文并序·····	汪中	46
二一	重过扬州记·····	龚自珍	48
二二	经旧苑吊马守真文并序·····	汪中	51
二三	游英伦大寺记·····	欧文	52
二四	游蜡人院·····	康有为	57
二五	晚间的来客·····	库普林	59
二六	鸭的喜剧·····	鲁迅	67
二七	秋夜与好的故事·····	鲁迅	71

一 卜居与渔父

屈 原

卜 居

屈原既放，三年不复得见，竭智尽忠，而蔽障于谗，心烦意乱，不知所从！

乃往见太卜郑詹尹曰：“余有所疑，愿因先生决之。”

詹尹乃端策拂龟，曰：“君将何以教之？”

屈原曰：“吾宁悃悃款款，朴以忠乎？将送往劳来，斯无穷乎？宁诛锄草茅，以力耕乎？将游大人以成名乎？宁正言不讳以危身乎？将从俗富贵以偷生乎？宁超然高举以保真乎？将哤訾栗斯，喔咻嚅唅，以事妇人乎？宁廉洁正直以自清乎？将突梯滑稽，如脂如韦，以洁楹乎？宁昂昂若千里之驹乎？将泛泛若水中之凫，与波上下，偷以全吾躯乎？宁与骐骥抗轭乎？将随驽马之迹乎？宁与黄鹄比翼乎？将与鸡鹜争食乎？此孰吉？孰凶？何去？何

从？世溷浊而不清；蝉翼为重，千钧为轻；黄钟毁弃，瓦釜雷鸣；谗人高张，贤士无名。吁嗟！默默兮！谁知吾之廉贞？”

詹尹乃释策而谢曰：“夫尺有所短，寸有所长；物有所不足，智有所不明；数有所不逮，神有所不通。用君之心，行君之意，龟策诚不能知此事！”

渔 父

屈原既放，游于江潭，行吟泽畔，颜色憔悴，形容枯槁。

渔父见而问之曰：“子非三闾大夫欤？何故至于斯？”

屈原曰：“举世皆浊我独清，众人皆醉我独醒，是以见放！”

渔父曰：“圣人不凝滞于万物，而能与世推移。世人皆浊，何不淈其泥而扬其波？众人皆醉，何不哺其糟而歠其醪？何故深思高举，自令放为？”

屈原曰：“吾闻之，新沐者，必弹冠；新浴者，必振衣；安能以身之察察，受物之汶汶者乎？宁赴湘流，葬于江鱼之腹中，安能以皓皓之白，而蒙世俗之尘埃乎？”

渔父莞尔而笑，鼓枻而去。歌曰：“沧浪之水

清兮，可以濯吾缨；沧浪之水浊兮，可以濯吾足。”遂去，不复与言。

二 伯夷列传

司马迁

夫学者，载籍极博，犹考信于《六艺》，诗书虽缺，然虞夏之文可知也。

尧将逊位，让于虞舜，舜、禹之间，岳牧咸荐，乃试之于位，典职数十年。功用既兴，然后授政。示天下重器，王者大统，传天下若斯之难也。而说者曰：“尧让天下于许由，许由不受，耻之，逃隐。及夏之时，有卞随、务光者。此何以称焉？”太史公曰：“余登箕山，其上盖有许由冢云。孔子序列古之仁圣贤人，如吴太伯、伯夷之伦详矣！余以所闻由、光义至高，其文辞不少概见，何哉？”

孔子曰：“伯夷、叔齐不念旧恶，怨是用希。求仁得仁，又何怨乎？”余悲伯夷之意，睹轶诗，可异焉。其传曰：

“伯夷、叔齐，孤竹君之二子也。父欲立叔齐，及父卒，叔齐让伯夷；伯夷曰：‘父命也。’

遂逃去。叔齐亦不肯立而逃之；国人立其中子。于是，伯夷、叔齐，闻西伯昌善养老，盍往归焉；及至，西伯卒。武王载木主，号为文王，东伐纣，伯夷、叔齐叩马而谏曰：‘父死不葬，爰及干戈，可谓孝乎？以臣弑君，可谓仁乎？’左右欲兵之，太公曰：‘此义人也。’扶而去之。武王已平殷乱，天下宗周，而伯夷、叔齐耻之，义不食周粟，隐于首阳山，采薇而食之。及饿且死，作歌。其辞曰：‘登彼西山兮，采其薇矣！以暴易暴兮，不知其非矣！神农、虞、夏，忽焉没兮，我安适归矣！吁嗟徂兮，命之衰矣！’遂饿于首阳山。”

由此观之，怨邪？非邪？或曰：“天道无亲，常与善人。”若伯夷、叔齐，可谓善人者，非邪？积仁絮行如此，而饿死。且七十子之徒，仲尼独荐颜渊为好学，然回也屡空，糟糠不厌，而卒蚤夭；天之报施善人，其何如哉！盗跖日杀不辜，肝人之肉，暴戾恣睢，聚党数千人，横行天下，竟以寿终；是遵何德哉！此其尤大彰明较著者也。若至近世，操行不轨，专犯忌讳，而终身逸乐富厚，累世不绝；或择地而蹈之，时然后出言，行不由径，非公正不发愤，而遇祸灾者，不可胜数也。余甚惑焉；悦所谓天道是邪？非邪？子曰：“道不同，不相为谋。”亦各从其志也。故曰：富贵如可求，虽执

鞭之士，吾亦为之，如不可求，从吾所好。岁寒然后知松柏之后凋，举世混浊，清士乃见。岂以其重若彼，其轻若此哉？君子疾没世，而名不称焉。

贾子曰：“贪夫徇财，烈士徇名，夸者死权，众庶冯生”，“同明相照，同类相求，云从龙，风从虎，圣人作而万物睹”，伯夷、叔齐虽贤，得夫子而名益彰；颜渊虽笃学，附骥尾而行益显。岩穴之士，趋舍有时，若此类名埋灭而不称，悲夫！闾巷之人，欲砥行立名者，非附青云之士，恶能施于后世哉！

三 李夫人临死托武帝

班 固

初，李夫人病笃，上自临候之。夫人蒙被谢曰：“妾久寝病，形貌毁坏，不可以见帝；愿以王及兄弟为托！”上曰：“夫人病甚，殆将不起！一见我，属托王及兄弟；岂不快哉！”夫人曰：“妇人貌不修饰，不见君父，妾不敢以燕媼见帝。”上曰：“夫人第一见我，将加赐千金，而予兄弟尊官。”夫人曰：“尊官在帝，不在一见。”上复言，欲必见之。夫人遂转向歔歔而不复言。于是上不说而起。

夫人姊妹让之曰：“贵人独不可一见上，属托兄弟邪？何为恨上如此！”夫人曰：“所以不欲见帝者，乃欲以深托兄弟也。我以容貌之好，得从微贱爱幸于上。夫以色事人者，色衰而爱弛，爱弛则恩绝。上所以恋恋顾念我者，乃以平生容貌也。今见我毁坏，颜色非故，必畏恶吐弃我，意尚肯复追思闵录其兄弟哉？”及夫人卒，上以后礼葬焉。其后，上以夫人兄李广利为贰师将军，封海西侯，延年为协律都尉。

上思念李夫人不已，方士齐人少翁言能致其神。乃夜张灯烛，设帐帷，陈酒肉，而令上居他帐，遥望见好女如李夫人之貌，还幄，坐而步；又不得就视。上愈益相思悲感，为作诗曰：“是邪？非邪？立而望之，偏何姗姗其来迟！”令乐府诸音家弦歌之。

四 李陵说苏武

班 固

……初，武与李陵俱为侍中。武使匈奴，明年，陵降，不敢求武。

久之，单于使陵至海上，为武置酒设乐。因谓

武曰：“单于闻陵与子卿素厚，故使陵来说足下，虚心欲相待。终不得归汉，空自苦亡人之地，信义安所见乎？前长君为奉车，从至雍棧阳宫，扶辇下除，触柱折辕，劾大不敬，伏剑自刎，赐钱二百万以葬。孺卿从祠河东后土，宦骑与黄门驸马争船，推堕驸马河中溺死。宦骑亡，诏使孺卿逐捕，不得，惶恐饮药而死。来时太夫人已不幸，陵送葬至阳陵。子卿妇年少，闻已更嫁矣。独有女弟二人，两女一男，今复十余年，存亡不可知。人生如朝露，何久自苦如此！陵始降时，忽忽如狂，自痛负汉，加以老母系保宫，子卿不欲降，何以过陵？且陛下春秋高，法令亡常，大臣亡罪夷灭者数十家，安危不可知，子卿尚复谁为乎？愿听陵计，勿复有云。”武曰：“武父子亡功德，皆为陛下所成就，位列将，爵通侯。兄弟亲近，常愿肝脑涂地。今得杀身自效，虽蒙斧钺汤镬，诚甘乐之。臣事君，犹子事父也，子为父死，无所恨。愿勿复再言。”

陵与武饮数日，复曰：“子卿壹听陵言！”武曰：“自分已死久矣！王必欲降武，请毕今日之欢，效死于前。”陵见其至诚，喟然叹曰：“嗟乎！义士。陵与卫律之罪，上通于天！”因泣下沾衿，与武诀去。

昭帝即位，数年，匈奴与汉和亲。汉求武等，

匈奴诡言武死。

后汉使复至匈奴。常惠请其守者与俱，得夜见汉使，具自陈过，教使者谓单于言：“天子射上林中，得雁，足有系帛书，言武等在某泽中。”使者大喜，如惠语以让单于。单于视左右而惊，谢汉使曰：“武等实在。”

于是李陵置酒贺武曰：“今足下还归，扬名于匈奴，功显于汉室，虽古竹帛所载，丹青所画，何以过子卿！陵虽弩怯，令汉且贯陵罪，全其老母，使得奋大辱之积志，庶几乎曹柯之盟，此陵宿昔之所不忘也！收族陵家，为世大戮，陵尚复何顾乎？已矣，令子卿知吾心耳！异域之人，壹别长绝！”陵起舞，歌曰：“径万里兮度沙漠，为君将兮奋匈奴。路旁绝兮矢刃摧，士众灭兮名已隳！老母已死，虽欲报恩将安归？”陵泣下数行，因与武决。

五 自 序

刘孝标

峻，字孝标。平原人也。生于秣陵县，期月归故乡。八岁，遇桑梓颠覆，身充仆圉。齐永明四年二

月，逃还京师，后为崔豫州刑狱参军。梁天监中，诏峻东掌石渠阁。以病乞骸骨，隐东阳金华山。

余尝自比冯敬通，而有同之者三，异之者四，何则？敬通雄才冠世，志刚金石；余虽不及之，而亮节慷慨，此一同也。敬通值中兴明君，而终不试用；余逢命世英主，亦摈斥当年，此二同也。敬通有忌妻，至于身操井臼；余有悍室，亦令家道坎轲，此三同也。

敬通当更始之世，手握兵符，跃马食肉；余自少迄长，戚戚无欢，此一异也。敬通有子仲文，官名成立；余祸同伯道，永无血胤，此二异也。敬通膂力刚强，老而益壮；余有犬马之疾，溘死无时，此三异也。敬通虽芝残蕙焚，终填沟壑，而为名贤所慕，其风流郁烈芬芳，久而弥盛；余声尘寂寞，世不吾知，魂魄一去，将同秋草，此四异也。所以力自为序，遗之好事云。

六 自 序

汪 中

昔刘孝标自序平生，以为比迹敬通，三同四

异，后世诵其言而悲之。尝综平原之遗轨，喻我生之靡乐，异同之故，犹可言焉。

夫亮节慷慨，率性而行；博极群书，文藻秀出。斯惟天至，非由人力。虽情符义哲，未足多矜。余玄发未艾，野性难驯；麋鹿同游，不嫌槟斥；商瞿生子，一经可遗。凡此四科，无劳举例。

孝标婴年失怙，藐是流离，托足桑门，栖寻刘宝。余幼罹穷罚，多能鄙事，赁舂牧豕，一饱无时，此一同也。孝标悍妻在室，家道坎坷。余受诈兴公，勃谿累岁；里烦言于乞火，家构衅于蒸梨；蹢躅东西，终成沟水，此二同也。孝标自少至长，戚戚无欢。余久历艰屯，生人道尽；春朝秋夕，登山临水，极目伤心，非悲则恨，此三同也。孝标夙婴羸疾，虑损天年。余药裹关心，负薪永旷；鰥鱼嗟其不瞑，桐枝惟余半生；鬼伯在门，四序非我，此四同也。

孝标生自将家，期功而上，参朝列者，十有余人；兄典方州，余光在壁。余衰宗零替，顾景无俦；白屋藜羹，馈而不祭，此一异也。孝标倦游梁、楚，两事英王；作赋章华之宫，置酒睢阳之苑；白璧黄金，尊为上客，虽车耳未生，而长裾屡曳。余簪笔佣书，倡优同畜，百里之长，再命之士，苞苴礼绝，问讯不通，此二异也。孝标高蹈东阳，端

居遗世；鸿冥蝉蜕，物外天全。余卑栖尘俗，降志辱身；乞食饿鸱之余，寄命东陵之上；生重义轻，望实交陨，此三异也。孝标身沦道显，籍甚当时；高斋学士之选，安成《类苑》之编，国门可悬，都人争写。余著书五车，数穷覆瓿；长卿恨不同时，子云见知后世，昔闻其语，今无其事，此四异也。孝标履道贞吉，不干世议。余天谗司命，赤口烧城，笑齿啼颜，尽成罪状；跬步才蹈，荆棘已生，此五异也。

嗟乎！敬通穷矣，孝标比之，则加酷焉；余于孝标，抑又不逮，——是知九渊之下，尚有天衢；秋荼之甘，或云如荠。我辰安在，实命不同！——劳者自歌，非求倾听；目瞑意倦，聊复书之。

七 与子俨等疏

陶 潜

告俨、俟、份、佚、佟：

天地赋命，生必有死；自古贤圣，谁能独免。子夏有言：“死生有命，富贵在天。”四友之人，

亲受音旨。发斯谈者，将非穷达不可妄求，寿夭永无外请故耶！

吾年过五十，少而穷苦；每以家敝，东西游走。性刚才拙，与物多忤，自量为己，必贻俗患，辄俯辞世，使汝等幼而饥寒。余尝感孺仲贤妻之言：“败絮自拥，何惭儿子。”此既一事矣。但恨邻靡二仲，室无莱妇，抱兹苦心，良独内愧。

少学琴书，偶爱闲静，开卷有得，便欣然忘食。见树木交荫，时鸟变声，亦复欢然有喜。常言五六月中，北窗下卧，遇凉风暂至，自谓是羲皇上人。意浅识罕，谓斯言可保。日月遂往，机巧好疏，缅求在昔，眇然如何。

病患以来，渐就衰损；亲旧不遗，每以药石见救，自恐大分将有限也。汝辈稚小，家贫，每役柴水之劳，何时可免；念之在心，若何可言！

然汝等虽不同生，当思四海皆兄弟之义。鲍叔、管仲，分财无猜；归生、伍举，班荆道旧，遂能以败为成，因丧立功。他人尚尔，况同父之人哉！

颍川、韩元长，汉末名士，身处乡佐，八十而终，兄弟同居，至于没齿。济北、范稚春，晋时操

行人也，七世同财，家人无怨色。《诗》曰：“高山仰之，景行行之，虽不能尔，至心尚之。”汝其慎哉！吾复何言。

八 论盛孝章书

孔 融

岁月不居，时节如流；五十之年，忽焉已至。公为始满，融又过二。海内知识，零落殆尽。惟有会稽盛孝章尚存。其人困于孙氏，妻孥湮没，单孑独立，孤危愁苦。若使忧能伤人，此子不得永年矣。《春秋传》曰：“诸侯有相灭亡者，桓公不能救，则桓公耻之。”今孝章实丈夫之雄也，天下谈士，依以扬声，而身不免于幽繫，命不期于旦夕，是吾祖不当复论损益之友，而朱穆所以绝交也。公诚能驰一介之使，加咫尺之书。则孝章可致，友道可弘矣。今之少年，喜谤前辈，或能讥评孝章，孝章要为有天下大名，九牧之人，所共称叹。燕君市骏马之骨，非欲以骋道里，乃当以招绝足也。惟公匡复汉室，宗社将绝，又能正之。正之之术，实须得贤。珠玉无胫而自至者，以人好之也，况贤者之有

足乎！昭王筑台以尊郭隗，隗虽小才，而逢大遇，竟能发明主之至心。故乐毅自魏往，剧辛自赵往，邹衍自齐往。向使郭隗倒悬而王不解，临难而王不拯，则士亦将高翔远引，莫有北首燕路者矣。凡所称引，自公所知，而复有云者，欲公崇笃斯义也。因表不悉。

九 与吴质书（二则）

曹 丕

（一）

二月三日，丕白。

岁月易得，别来行复四年。三年不见，《东山》犹叹其远，况乃过之，思何可支！虽书疏往返，未足解其劳结。

昔年疾疫，亲故多离其灾；徐、陈、应、刘，一时俱逝，痛可言邪！昔日游处，行则连舆，止则接席，何曾须臾相失！每至觴酌流行，丝竹并奏，酒酣耳热，仰而赋诗。当此之时，忽然不自知乐